

## Neprijiemė

(Ne anėkduots, bet tėkros atsėtėkėms)

Tas bova priš ketorėsidešimt metu. Tumet bovau jauna muokītuojė. Muokiau Šatramėniū pradinie muokīkluo. Muokīklas vediejė bova Marītė Prošinskienė, anuos vīrs Liodvėks Prošinskis – „Ateitėis“ kolkuoza pėrmėninks. Klūba – skaitīklas vediejo dėrba Bargaila (varda užmėršau). Ons bova ėr kolkuoza komonistu partenės organizacėjės sekretuorios. Organizacėjuo bova tik pėnkė narė, vėsė vīrā.

Pavasari vīka kažkuokėi balsavėmā. Bovau balsavėmu kuomisijuo. Prošinskis so Borgailo jiemė moni ragintė stuotė i partėjė. Šėp prirokava, ėr parašiau pareiškėma. Omžėnatilsi mona mama sakė: „Nestuoak i tuo partėjė, to vėina sosėdiesi so vīrās, vėsėms ont jouka palėksi, ni žanītėis nebgausi.“ Vuo kori mergė nenuor žanītėis? Nuoriejau atsėjimtė pareiškėma. Nedavė.

Vėina vasaras rīta pri nomū raviejau bolvės. Mama moni pavadėna: „Pėrmininks atvažiou. Kavuoakės!“ Vuo kor? Ės po vėsas truobas ėr atras. Žemėnuoms ronkuoms ėr basuoms kuojoms šmurkšt po luovo.

Įiejės pėrmėninks klausė: „Vuo kor muokītuojė?“ Matiem, kad raviejė.“ Mama sakė: „Nežėnau, kor ana palėka.“ Prošinskis: „Vo kėinuo kuojės po luovuo? Oliesė, līsk lauk! Grėtā prauskės, pasėpoušk. Palauksem mašėnuo. Ėr važioujem i Skouda.“ Nuvažiavuum. Įiejau i kabineta. Monės paklausė: „Dėlkuo nuori stuotė i partėjė?“ Atsakiau: „Nenuorio, bet kad baisė ragėna, nebgalieju atsėkrafitė.“ Gīveno karto so tievās. Vėsas sėinas apkabėnietas švėntūju abruozdās. Mama nelėd stuotė i partėjė. Mon pasakė: „Galėt ėtė.“ Vėsa gera ėr ėšejau. „Kāp gerā, kad neprijiemė!“ – mėslėjau sau. Ėr dabā stebious, kuoks pruotings ėr duors bova tas rajuona kompartėjės sekretuorios. Ons galiejė praneštė švėitėma skīriou aple mona vaikėška puoelgi, ėr moni būtuo ėšvėlpėnė ėš darba.

Ka dėrbau Tieveliū aštuonmetie, kolkuoza pėrmėninks Kazėnkuovs ragėna stuotė i partėjė. Ėr Skouda vėdorėnės muokīklas (dabā P. Žadeikė gėmnazėjė) dėrektuorios Aleksandros Duokšos daug kartu ragėna. Liubuo papasakuotė tuo istuorėjė, kad neprijiemė, ėr tėp liubuo atsėkrafitė.

Omžėnatėlsi mona bendradarbis Stapuons joukās, liuob sakītė: „Apsėgaudėnā, Aleksandra, kad nestuojė i kompartėjė. Būtomi bovusi garbinga“. Ėš tėkrūju, gal ėr apsėgaudėnau, bet nesėgailio.